

■ NOSS MORTS

Ina vita per il Tirol: Viktoria Stadlmayer (1917–2004)

Ils 25 da favrer, gist avant il Di mundial da las dunnas (8 da mars) è morta a Puntina quella ch'ins enconuscheva sco «Frau Hofrat» e che ha bullà il pli ferm la politica austriaca areguard il Tirol dal sid. Viktoria Stadlmayer è morta paucs dis avant las tschernas dal cussegl grond da Salzburg (7 da mars), las qualas han dà glisch verda a l'elecziun da l'emprima guvernatura («Landeshauptfrau») da l'istorgia austriaca. La Tirolaisa era disada a sesidas da lavur nua ch'ella era la suletta dunna amez umens uschè prominents sco il minister da l'exteriur e futur chancellor federal Bruno Kreisky (1911–1990). Ella sezza, sco persunalitad excepziunala, ha vivì ed è morta cun duas passiuins, las duas varts da la lescha etica che l'animava sco istoricra e dunna da stadi e ch'ella ha surlaschè sco in legat a las generaziuns pli giuvnas, numnadain il Tirol e la vardad.

Dal chastè muntagnard a la praschun taliana

Viktoria è naschida ils 22 d'avust 1917 a Brixen, chapitala religiosa da Tirol. Ses bab Rüdiger, uffizier dals legendaris «Kaiserjäger» tirolais, erà turnà dals emprims cumbats da guerra mundiala cun in'invaliditad da 80%; perquai è la creschida si tar parents en plis lieus da l'Austria e Germania. La stad stav'la adina tar il barba, en il chastè da Trostburg a Waidbruck, tranter Brixen e Balsaun, nua che la Val Gherdeina sbucca en la vallada da l'Eisack. La mamma da Viktoria era la contessa Elisabeth Wolkenstein-Trostburg. Suenter il doctorat a Vienna, cun ina dissertaziun davart il Tirol en il 19avel secul, ha Viktoria lavurà sco perscrutadra en in institut da Puntina. La stad 1943, suenter l'arrestaziun dal «duce» a Roma, era la giuvna incumbensada d'interpretar la pressa taliana. Ils 3 da settember ha la rapportà ch'allusiuns da las gasettas mainian a la conclusiun che l'emprim minister mar-

schal Pietro Badoglio (1871–1956) saja per concluder in armistizi cun ils alliads anglosaxons. Quai constava ed è vegnì public il 8. Suenter la guerra e la restauraziun dal Tirol dal nord e da l'ost sco pajais federativ austriac, ha quest emploià la giuvna talentada en in post deditgà al Tirol dal sid, annectà 1919 da l'Italia. Là ha la sviluppà l'art d'analisar las gasettas e d'emplenir stgaffas cun retagls ch'ella metteva en connex ils ins cun auters. Ella rimnava tut, chattava tut, saveva tut. 1956–1957 ha la lavurà a Vienna en il ministeri da l'exteriur. Lura l'ha la regenza tirolaisa numnada mandra da l'uffizi responsabel per il Tirol dal sid. 1960–1964 cun Kreisky ha la fatg part da bunamain tuttas tractativas internaziunalas davart lezza provinza taliana cun maioritad tudestga. Be en matg 1961 a Klagenfurt è la sutga da Stadlmayer restada vida. L'auta funcziunaria tirolaisa occupava lezza giada ina cella en la praschun da Balsaun. Là ha la stuì star sis emnas, «inculpada da participaziun ad in attentat (...). Finalmain han tuttas accusaziuns sa mussadas tuttafatg nunfundadas; ils 10 da zercladur han ins stuì la metter en libertad (...). Sia arrestaziun l'ha tuttina gidada en moda tuttafatg decisiva a vegnir populara; (...) en l'Italia l'han ins numnada 'la Passionaria del Tirolo'» (1). Cun il statut d'autonomia da 1972 per il Tirol dal sid ha la sa deditgada cunzunt a las relaziuns cun la provinza, la lavur culturala e l'agid a la giuventetgna da là che studegiava a l'Universitad da Puntina, nua ch'ella ha dà curs d'istorgia 1985–1995 sco pensiunada.

Perscrutaziun dal passà, quitads per il futur

Anc en il 21avel tschientaner ha la perscrutà il passà tirolais. 2002 è cumparida sia lavur istorica, basada sin retschertgas profundas e minuziusas, davart la rolla decisiva d'Alcide De Gaspe-

ri (1881–1954), emprim minister talian 1945–1953, tar la fixaziun dals cunfins da ses pajais cun l'Austria e la Jugoslavia. L'autura ha mussà che lez politicher ha ja impedi l'applicaziun dal dretg d'autodeterminaziun en il Tirol dal sid tudestg e ladin ed sin la costa vest, cleramain taliana, da l'Istria (oz cunzunt en Croazia). Stadlmayer reproducescha t. a. ina chaputschinada tramessa 1946 d'in uvestg da l'Istria a De Gasperi: «Jau temel zunt per la costa vest, tant pli suenter l'attribuziun uschè simpla dal Tirol dal sid a l'Italia. Ins fa resortir che nus na possian pretender noss dretgs sin basa etnica, oramai ch'ins n'ha betg fatg quai a favur da l'Austria. Qua din ins che nus avessan gi vistas bler meglieras da success (...) sch'ins avess renconuschì il dretg d'autodeterminaziun a quella gliued [dal Tirol dal sid] (...). Igl è ina malignadad» (2). Cun Viktoria Stadlmayer perda il Tirol in'admonidra che na temeva d'exprimer ses quitads davart l'avegnir. Ella crititgava il spiert d'arrivists da bliers Tirolais dal sid, lur arroganza visavi il Tirol dal nord main favurisà da la natira, lur levseinn areguard las bellezzas da lur pajais. Per cletg vivan e lavuran en il Tirol dal sid autras dunnas valurusas e malcumadaivlas che ristgan da far udir lur vusch critica – per exempel Hilda Pizzinini che per decennis, sco parsura da l'Uniun da Ladins dolomitans, ha defais cun curaschi il dretg da viver da lezzas pitschnas minoritads, na be quella da Balsaun, mabain era quella da Trentin e da Veneto, en valladas che faschevan part dal Tirol enfin a 1919. Per talas dunnas po e sto l'entir Tirol savair grà.

1) Robert Gismann en: *Tirol im 20. Jahrhundert. Festschrift für Viktoria Stadlmayer*. Balsaun (Athesia, ISBN 88-7014-523-9) 1989, p. 15.

2) Viktoria Stadlmayer, *Kein Kleingeld im Länderschacher*. Puntina (Wagner, ISBN 3-7030-0364-2) 2002, p. 322.